



Tge manegia la delegaziun grischuna en il cussegl naziunal da l'energia nucleara? Da san. Andrea Hämmerle, Sep Cathomas, Tarzsius Caviezel, Brigitta Gadiant e Hansjörg Hassler.

FOTO B. SIMMEN

# Energia nucleara: Nua stattan ils parlamentaris grischuns?

## L'opiniun da quatter cussegliers naziunals

DA CLAUDIA CADRUVI / ANR

■ **Oz decida il cussegl naziunal davart l'avegnir da l'energia nucleara. Tge pensan ils tschintg politichers grischuns? Quatter vulan sortir da l'energia nucleara ed in vul s'abstegnair da la vusch.** «Jau na stoss betg midar opiniun.

Mia entira vita politica sun jau stà persuerter da sortir da l'energia atomara», di *Andrea Hämmerle* (ps). Il pli impurtant è tenor el ch'il cussegl naziunal decida oz da sortir da l'energia nucleara. La decisiun saja er in signal per l'economia. Lezza stoppia savair vi da tge ch'ella saja.

**Hämmerle: «I dovra in bun plan»**

Ma la decisiun da sortir na bastia sa chapescha betg. I dovria in bun plan co sortir, di Hämmerle. Quai ch'il cussegl federal haja proponì fin uss na saja betg sufficient. Pli tard, cun ina lescha che defineschia co sortir da l'energia nucleara, stoppian ins lura far lavur entira («Nägel mit Köpfen»). Fissi pussaivel ch'ils politichers midan puspè opiniun fin ch'ina tala lescha vegn tractada en il parlament? I existia bain il privel che tscherts politichers sa cumblidian puspè, di Hämmerle. Quai saja era capità suenter la catastrofa Tschernobyl. Ma l'accident a Fukushima en il Giapun saja in auter caliber e perquai saja el atgnamain optimistic.

Plinavant sajan politichers burgais, sco per exempel *Christophe Darbellay*, s'exponids fitg per ina sortida. Per tals politichers daventassi perquai pli tard fitg grev da puspè midar opiniun en questa dumonda.

**Cathomas: «Trair a niz l'energia indigena»**

«Jau hai midà opiniun suenter Fukushima», di *Sep Cathomas* (pcd). Avant saja el adina stà persuerter da renovar las ovras existentas. Oz veglia ina maioritad dal pievel sortir da l'energia nucleara, pertge il ristg saja memia grond. Ins saja era pront d'acceptar in pretsch pli aut per il current. Perquai è Cathomas persuadi che la strategia dal cussegl federal – sortir pass per pass – saja la dretga.

Passa 40 oraturs dastgan oz discurren durant la debatta. Era Cathomas pleda en num da sia fracziun. El ha en senn da far attent che la Svizra na possedia naginas resursas fossilas sco ieli, charvun, gas u uran. Ina strategia d'energia stoppia tegnair quint da quest fatg. Ins stoppia nizzegiar pli bain las atgnas resursas d'energia – saja quai l'aua, la laina u il sulegl.

**Hassler: «Prender cumià da l'energia nucleara»**

«Ins sto prender cumià da l'energia nucleara», di *Hansjörg Hassler* (pbd). «Jau sun persuerter da sortir dal nuclear sin ina mo-

da reglada sco quai ch'il cussegl federal ha proponì.» Quai na possia betg capitar d'in di sin l'auter. Ins stoppia mantegnair las ovras atomaras uschèditg sco ellas sajan segiras e tschentar giu la davosa ovra il 2030. La confederaziun duai sustegnair las energias regenerablas, uschia che quellas remplazzian en l'avegnir il current d'atom. I saja era d'optimar las ovras idraulicas.

El haja gia scrit avant quatter onns sin sia pagina d'internet ch'ins duai sortir da l'energia nucleara, di Hassler. Da lezzas uras eria ses motiv dentant il rument atomar per il qual ins n'haja anc chattà nagina soluziun. Uss suenter Fukushima stettian dentant ils privels da questa tecnologia en il center.

Era *Brigitta Gadiant* (pbd) beneventa l'idea d'abandonar l'energia nucleara. Ella n'ha ier dentant betg gi temp per in discurs.

**Caviezel: «I dat memia bleras dumondas avertas»**

Malgrà che *Tarzsius Caviezel* (pld) sesa en il cussegl d'administraziun da la Burkhalter Group – il pli grond electorinstallatur da la Svizra – na vul el per il mument betg sortir da l'energia nucleara. Ina sortida purtass blera lavur e gudogn als electroinstallatur, ma Caviezel è sceptic: «Jau vegn probabel a votar sco la fracziun.»

La pld vul s'abstegnair da la vusch tar

las moziuns davart la sortida da l'energia nucleara. Caviezel dat cleramain d'entellir ch'el votass pli gugent «na», pia cunter ina sortida da l'energia atomara. Pertge i dettia memia bleras dumondas avertas. Il cussegl federal stuess l'emprim sclerir, tge ch'ina sortida muntia per la populaziun e per l'economia. Il pievel stoppia savair sin tge ch'ins sa laschia en.

## 70 votaziuns – co salvar la survista?

Il cussegl naziunal tracta oz passa 130 intervenziuns parlamentaras. Ina buna part da quellas èn interpellaziuns che na dovran nagina votaziun. Ma davart 70 postulats e moziuns sto la chombra gronda votar entaifer curt temp. Per ch'ils parlamentaris na perdian betg la survista durant questa cascada da votaziun fa mintga fracziun glistas e recumonda nua ch'i saja da votar «gea», «na» u da s'abstegnair. Ils commembers da fracziun restan sa chapescha libers da votar sco els vulan.